

巻
下

巻
下

服部文庫
イ 17
2001
4





名二

貴字 愛日齋叢抄 禮檀弓 幼名 冠字 五
 十以伯仲 孔氏曰 人始生 三月而加名 故云
 幼名 年二十有為人父之道 同等不可復名^呼
 其名 故冠而加字 年至五十 者艾轉尊 又捨
 其二十之字 直以伯仲別之 士冠禮 二十已
 有伯某甫 而言至五十 直呼伯^仲 朱文公
 曰 吾五十即稱伯仲 除子下面兩字 猶令人
 不敢件尊者 呼為幾丈之類 是不可以字尊

子疑了

也。玉藻：士于君所言大人，沒矣則稱謚。若字名，與士大夫言，名士大夫言于君前，士名而大夫字，字為貴。及與大夫言而字，為尊矣。馬永卿赴亳州永城簿，初見劉器之諫議，問曰：王築安否？曰：王學士安樂。後劉公為孫宰，言新主簿可見後生不稱前輩表德，此為得體。童蒙訓曰：故家惟晁氏羣居相處，呼外姓尊長，必曰某姓第幾叔，若兄，諸姑尊姑之夫，必曰某姓姑夫，某姓尊姑夫，亦嘗敢呼字也。

又曰：榮陽公外弟楊公韓環，云與它人語稱楊公，但曰內兄，或曰侍講，未嘗敢稱字也。舍人禠志云：張正素先生子厚，名望，東萊公從表兄也。長東萊公十餘歲，與書未嘗呼字。楊器之大夫名寔，寶榮陽公表弟，于東萊尊行也。與東萊公書，亦未嘗呼字。往時俗人有視楊應之學士為尊行者，在朝中呼應之。△回首不應，榮陽公以應之，當如卑不敢字尊，尊固不得字卑也。故呂進伯逐門字，容謂呼小

△子字豈可為人師疇酢世變亦云字者朋友之職也嘗見前輩不呼後進者要稱字以代名為成人之禮尊者疑其斥之卑者且不敢當獨朋友無相尊卑可字也李文公答朱載書論此書云古人相接有等輕重有儀如師之于門人則名之于朋友則字而不名稱之于師則雖朋友亦名之夫子于鄭兄事子產于齊兄事晏嬰平仲傳曰子謂子產有君子之道四焉又曰晏平仲善與人交子夏曰言

遊過矣子張曰子夏云何曾子曰堂：乎張也是朋友字而不名驗也謂朋友字而不名正孔子同等不可以名而加字者也顏氏家訓云名以體正字以表德名終則諱之字乃可以為孫氏孔子弟子記事皆稱仲尼呂后微時常字高祖為季至漢袁種子其叔父曰絲王丹與蒯霸子語字霸為君房江南至今不諱字也河北士人全不辨之名亦呼為字字固因呼為字尚書王元景兄弟皆號名人

其父名雲字羅漢一皆諱之其餘不足恠也
續家訓云魏常林年七歲父黨造門問林伯
先在否何不拜伯先父之字也林曰臨子字
父何拜之有庾翼子爰嘗候孫盛見盛子放
問曰安國何在放答曰在庾推恭家蓋放子
以爰客字父亦字其父王丹對侯曰上而字
其父曰上不以為嫌且字何以為孫氏古尊
卑通稱春秋書紀季姜蓋季者字也杜預曰
書字者伸父母之尊以稱字為貴也謂子諱

父字非諱之也稱其父字于人之子有所尊
△而不敢當亦宜也顏氏舉字可以詳荆公序
石仲卿字以為成人則貴而字之春秋二百
四十二年以字而不名者十二人而已不失
其所以貴乃尔少也石林葉氏云孔子雖大
司寇而但稱仲尼哀公誅之曰尼父仲山甫
尹吉甫皆周之卿士而山甫吉甫猶通稱或
者亦以字為重欵陸務觀筆記字所以表其
人之德故傳者謂夫子曰仲尼非慢也先左

丞每言及荆公只曰介甫蘇季明書張橫渠
事亦只曰子厚左丞謂農師也鶴山魏氏尤
信此說其記常熟^縣學有曰昔柳宗元謂論語
所載弟子必以字惟曾子有子不字遂謂是
書出于曾門蓋以字輕而子重也及考謂孔
門之訓則字為至貴蓋字與子皆得兼稱如
門人之于孔子進而稱子不敢退而稱仲尼
不言子其次亦有既子且氏如閔子騫等不
一二人或字者又數人然淵子至游夏最號

為高弟子而不得子也有子曾子子而不得
字也就二者論則字為尊蓋子雖有師道之
稱然繫子氏者不過男子之美稱耳故孝經
字仲尼而子曾子禮運字仲尼而名言偃至
于子思字其祖孟子字其師之祖相傳至今
人之字仲尼者毋敢以為疑字既尊矣則雖
以孟子亞聖亦不得以字行不寧惟是仲尼
作春秋二百四十二年間字而不名者僅十
有二人而游夏之門人亦各自其師相承至

于漢初猶未敢輕以字許人。答張行甫書。古人稱字者最不輕。儀禮子孫於祖禰皆稱字。孔門弟子多謂為夫子為仲尼。子思孫也。孟子又子思弟子也。亦皆稱仲尼。至漢魏後。只稱仲尼。雖今人亦稱之。而人不為恠。游夏之門人皆字其師。漢初惟子房一人得稱字。中世有字其諸父字其諸祖者。近世猶有後學呼退之。兒童誦君實者。今日胡子仁仲。張子敬夫。朱子元晦。是尊敬之至。答羅愚書。古人

以字為重。雖孔子弟子與子思皆呼孔子為仲尼。與誦相似。皆人所通稱也。今人呼前輩字。遂謂不然。題韓氏墓志後。或問先賢可字乎。曰若用孔門弟子與子思孟子稱仲尼例。則字先賢已過矣。凡此俱推稱字為貴。洪景廬云。論語所記孔子與人語。及門弟子。并其人問答。存其名。未有稱字者。雖顏冉高第。亦曰回。曰雍。唯至閔子。獨云子騫。終此書無損名。昔賢謂論語出于曾子。有子之門人。予意

亦出于閔氏。觀所言閔子侍側之辭，異冉有子貢子路不同，則可見矣。其說正魏氏所謂游夏之門人各字其師者也。周益公疑無己作王平甫集序，字歐公，至子固，則曰南豐先生，無己何尊焉。至于傳道之師，則不可以不別。是知其字爲天下通稱，若不逮所尊而尊之者，特別其師資之私敬，無以過於字也。蓋參古今而論，則臨文記事，尊者稱之以字，非不敬也。應對之頃，書疏之間，則字于其朋友。

從呂氏說可也。世俗去古遠，徒知不可以字，而更以號稱，猶未可也。况不惟尊其不可字者如此，故雜記之。冀來者識字之所以貴也夫。

自稱字 同上。乾道間，陸放翁取家藏前輩筆札，刻石嘉州荔枝樓下，名宋法帖，予得其本。有陳文惠書，首云堯佐曰，而後云希元再拜。希元文惠字也。自稱于書間，不可解。黃氏法帖刊誤云，柳少師與弟帖末云，誠懸呈人多。

疑之以籍注漢書丞相衡傳云字以表德豈人所自稱抑不當稱字然常觀逸少敬謝帖自云王逸少白廬山遠公集盧循與遠書自云范陽盧子先叩頭則古人稱字蓋或有之黃長睿精于攷古從其辨證如文惠稱字無疑矣按漢書張晏注云匡衡少時字鼎長乃易字稚圭世所傳衡與貢禹書上言衡敬報下言匡鼎白知是字也顏師古以為張氏說穿鑿假有其書乃後人見此傳云匡鼎來不

曉其意安作衡書云鼎白字以表德豈人所自稱乎長睿所引顏注謂此西京雜記云鼎衡小名也若文惠前名後字或取法漢人

寄褐 燕翼貽謀錄黃冠之教始於漢張陵故皆有妻孥雖居宮觀而嫁娶生子與俗人不同異奉其教而誦經則曰道士不奉其教不誦經惟假其冠服則曰寄褐皆游惰無所業者亦有凶歲無所給食假寄褐之名挈家以入者大抵主首之親故也太祖皇帝深疾之開

寶五年詔曰末俗竊服冠裳號為寄褐雜居
宮觀者一切禁斷道士不得畜養妻孥已有
家者遣出外居止今後不許私度須本師知
觀同詣長吏陳牒給公憑違者捕繫抵罪自
是宮觀不許停著婦女亦無寄食者矣而黃
冠之兄弟父子孫姪猶依憑以居不肯去也
名曰親屬大中祥符二年真宗皇帝詔道士
不得以親屬住宮觀犯者嚴懲之自後始與
僧同其禁約矣通雅謂今之火居道士也

羊子 唐回紇傳咸安公主下嫁可汗上書苟
為兄弟今為羊子也

稗沙門 容齋隨筆寶積經說僧之無行者曰
譬如麥田中生稗麥其形似麥不可分別尔
時田夫作如是念謂此稗麥盡是好麥後見
穞生尔乃知非如是沙門在於眾中似是持
戒有德行者施主見時謂盡是沙門而彼癡
人實非沙門是名稗沙門此喻甚佳而文士
鮮曾引月聊志於此

改姓


唐詩紀事唐彥謙陶穀之祖也穀避晉

祖諱改姓陶後遂不易識者非之

女校書

唐詩紀事薛濤好製小詩惜其幅大

狹小之蜀中號薛濤牋或以營妓無校書之
號韋南康欲奏之而罷後遂呼之胡曾詩曰
萬里樓臺女校書枇杷花下閉門居掃眉才
子知多少管領春風總不如



以下全て
白紙

